

Amasa-Villabona... Bai iragan ona!

Lumak

*Etxeko
lanak*

15 zbk. 2006ko martxoaren 5ean



Arropa zuri-zuriek in jantzen zituzten haurrak.

Eskeuz eta kanpo laguntzarik gabe egiten ziren etxe-ko lanak. Emakumeena zen ardura nagusia. Baina emakumeek ez zuten etxean bakarrik lan egiten, asko etxetik kanpora ere aritzen zen. Hori guztia gutxi balitz, umeen ardura ere euren zen. Horrenbeste aldatu ez den kontu

baten aurrean ote gaude? Gai horren aurrean, zaharrak berri direla oraindik? Kosta egiten da sustraitutako ohiturak aldatzea, baina saiatzean dago gako. Gainerakoan, lan egiteko modua errotik aldatu da. Ez zaudela oso ziur? Zatoz, zatoz..., jarrai irakurtzen.

KOMUNA ETA SUKALDEA, KALE ETXEAN ETA BASERRIAN

Baserrietatik kaleko etxeetara alde handia zegoen kasu gehienetan. Ura ere, baserri gehienetara, kalera baino geroago iritsi zen. Agaraitz baserrian bizi zen Ixabelek "ura etxearen atzean bagenuen; garbileku eta guzti baina, etxe barruan ez" azaldu du. Kalean bizi ziren Pakitak eta Pellok, etxean ura betidanik ezagutu zutela aipatu dute. Baserrian bizi arren, baita Encarnak ere, nahiz eta kasurik ohikoena ez izan, "orduan Amasan ez zen beste inon izango". Ura izanagatik, inon ez zegoen dutxarrik, baina bai komuna. "Komunak, en general, etxetik kanpora izaten ziren, patiora aterata" azaldu du Pellok. "Etxeak balkoia baldin bazuen, balkoiaren ondoan egoten zen. Komunera joateko balkoira atera behar, beraz. Haiek hotzak, neguan gauetz jaikitzea egokitzen zenean... Geroxeago etorri ziren barruko komunak". "Nik kalean ezagutu ditut solairu guztientzako komun bakarrik zuten etxe zaharrak, denentzat komun bat" gehitu du Pakitak. "Baserri gehienetan, erdian zuloa zuen eseri-aulki bat zen komuna. Goitik behera, beste egurrezko tapa bat izaten zuen zuloa estaltzeko". Baserri eta kale etxe askotan, komuna barruan zuen esertoki bat izaten zen, "zumitzarekin edo egurrearekin egindako eserlekuak tapa bat

izaten zuen. Hura altxa eta komunaren funtzioa betetzeko, pixontzia zeukan barruan. 'Silla-komuna' deitzen zitzaion eta gaixo zeudenek edo ezinduek erabiltzen zuten". Eserleku berezi haren erabilera oso garrantzitsua zela diote hizlariek, "bat edo beste ohean geratu baldin bazen eta, komuna etxearen bigarren solairuan bazegoen, 'silla-komuna' erabiltzen zen. Orain ere, kasu askotan ez litzateke gaizki etorriko; gaixo dagoenak nonbait egin behar baititu eginbeharrak". 'Silla-komuna' pieza bakarrekoa zenez, batetik bestera garraia zitezkeen, "logelan, egongelan nahiz sukaldean, nahi zen lekuan jartzen zen. Gainera, komuna erabili behar ez zenean, aulki modura ere erabili zitezkeen". Batzuk atzetik irekiak ziren, baldea edo pixontzia jarri eta kentzeko. Beste kasu batzuetan, dena itxia izaten zen eta gainetik aldatzen zen, tapa altxatu eta gero. Dutxarrik ez zegoen, ez kalean ez baserrian. Balde batean ura hartu eta sukaldean garbitzen ziren ahal zuten bezala. "Dutxatu ez, garbitu egiten ginen. Akordatzen naiz barrinoin handi bat hartu eta, txikienetik hasita, errenkan nola garbitzen ginen xaboiarekin. Ohera joaterako, ur epelarekin, oinak garbitzen genituen gure etxean behintzat" azaldu du Encarnak.



Isabel Beraza

"Ura etxearen atzean bagenuen; garbileku eta guzti baina, etxe barruan ez"

"Hala ere, gehienetan errekatari garbitzen ginen, noizean behin joanda" adierazi du Pellok.

Baserriko sukaldeetan su baxua nagusitzen zen eta ekonomika ere bai kasu askotan. Labetxoa baserri gehienetan izaten zen, "bi zulo zituen eta egur-ikatzarekin pizten zen. Egur berezietan, otorduren bat prestatu behar zenean erabiltzen zen. Ederki erretzen zituen jakiak". Kale etxeetan ez su baxurik eta labetxorik ere ez, ekonomika izaten zen; "pizteko, egurra erabiltzen zen eta zotzak ere bai. Zenbat alditan jarri ote genituen zotzak bezperatik labearen sartuta berotzen, hurrengo goizean sua pizteko? Zotzak ihartu egiten ziren berotasunarekin, bestela nola piztu sua?". Txikitutako egurra ere ekartzen zen etxera, "egurra txikitzen zuen gizonezkoak maitea zuen emakumeak. Kalean edo zerrategietan erosten zen eta loteak ere saltzen ziren. Mendian egurra ematen zuten eta itzainek etxera ekartzen zuten eskatuz gero; garraioa ordainduta, noski". Janaria prestatzerakoan, ekonomika edo su baxua erabili, alde nabari zela aipatu dute hizlariek, "ekonomikan, errazago eta txukunago egiten zen lan. Su baxuan, larretatik neskamea zintzilikatu behar zen aurrea. Narrasagoa zen". Egungo aurrerakuntzak ekarri dituzte mahaira, "gaurko bitrozeramikak baino txarragoa ez zen ekonomika" esan du Pellok. "Askoz ere hobea" erantzun dio Pakitak. "Behin sua piztu eta gero, janaria beroan mantentzen zuen ekonomiak. Lana ematen zuen, baina ez zen batera txarra". Jakien zaporean nabaritzen zen alde, "jana goxoagoa ere bai askotan ekonomikan, bere grazia



Jaki goxoak prestatzeko su beroa ekonomikan.

bazuen. Jatekoa denbora gehiago eduki behar zen irakiten. Presaka hastea alferrikakoa zen, eltzea gozatu egin behar baitzen". Alde txarren bat izatekotan, horixe, zikina

zela. "Zikina zen, hori bai. Azpitik atera behar zen hauts harekin beltz-beltz egiten zinen eta sukaldea ere dena zikintzen zen. Gainera, aurreko tapa irekiz gero, brasak

ere erori egiten ziren. Gehienetan ekonomikaren olaren gainean zinkeko txapa izaten zen, lurrean ez baitzegoen baldosarik, egurra baizik".

LOGELAK, JANGELAK, ALDABAK, GANBARAK...

Logela bakoitzean pare bat ohe izaten zen eta, anai-arreba txikienek, ohe berean egiten zuten lo, "ez pentsa, oraingo ohe handiak baino txikiagoak ziren haiek". Hiru bat logela izaten ziren guztira, "kalean nahiz baserrietan gela asko gortinekin bereizten ziren, aterik gabe. Alkobak esaten zitzaion". Arropak gordetzeko ez zuten armairurik, "armairurik ez, komodak erabiltzen genituen guk. Baxuak ziren eta txikiak, ispilurik gabeak. Orain adinako arroparik ez zenez, ez geneukan leku arazorik". Etxe eta baserri gehienetako logeletan, garbiketarako lababoa izaten zen,



Lababoa, harizko eskuoihal eta guzti.

"egurrezko oinarri batean, portzelanazko palankana bat. Gainaldean ispilua eta azpian txarro txuria. Medikua etortzen zenean txarro dotore hartatik botatzen zitzaion eskuak garbitzeko ura". Izan ere lababo hura ez zuten etxeok erabiltzen, "medikua, alkatea, apaiza edo pertsona garrantzitsuren bat etortzen zenean soilik erabiltzen zen. Bisita haietarako txukuntxukun atontzen zen, harizko eskuoihala, xaboi puska..., etxean zegoen onena ateratzen zen". Encarnak umetan ikusitako pasarte bat ekarri du mahaira, "akordatzen naiz Blenner Villabonako alkate zenean, aita gurea guarda nola zen, menditik buelta egin eta alkatea etxe atariko bankuan eserita zegoela. Ama gurea gaixoa, bere palankana, txarro zuria eta harizko eskuoihala hartuta atera zen atarira". "A ze errespetua! Gizon sentzilloa izanagatik, hala izaten zen. Han atera zuen eskuoihal hura ere ondo jasota edukiko zuen armairuan", ondorioztatu dute Pepitak eta Pellok.

Egongelari jangela deitzen zioten, "egun handietan, bazkaltzeko elkartzen ginen han. Ez ziren egungo egongelak bezalakoak. Jateko mahaia, aulkiak eta armairu bat izango zituen". Baserriak, aukera gehiago ere eskaintzen zuen bazkari handietarako, "baserri askotan, festetako bazkariak mandioan egiten zituzten. Norbait ezkontzen zenean, txekorra hil eta bi eta hiru eguneko eztei festak antolatzen ziren. Gosaria,



Maritxu Mendizabal

"Medikua, alkatea, apaiza edo pertsona garrantzitsuren bat etortzen zenean soilik erabiltzen zen lababoa"

bazkaria eta afaria barne. Horrenbeste jenderentzat jana su baxu hartan jartzen zen... Norbaitek gogotik egin beharko zuen lan".

Kale etxeetako sarreretan ez zegoen txirrinik, noski. "Burdinezko aldabak genituen. Forma askotakoak; esku itxurakoak batzuk, pilota formakoak besteak... Bigarrengoari deitu nahi zionak 'kank-kank', bi golpe jotzen zituen. Hirugarrengoari deitu nahi zionak, berriz, 'kank-kank-kank', hiru golpe. Ezker-eskubikoekin etorriko ziren kontuak, baina generalean, ez ziren bereizten; solairu osokoak baitziren etxe gehienak". Egund, nork pentsa ate zabalduarekin lo egitea? Garai hartan ez zegoen lapurreta arriskurik. "Aldaba norbait deitzeko erabiltzen genuen soilik. Gainerakoan, ate denak beti irekita izaten ziren, egunez nahiz gauetz. Ez genituen sekula ixten, hotzagatik ez bazen behintzat. Ez zegoen lapurretarako beldurrik; ez kalean, ez baserrian. Errespetu hori bazen".

Etxe gehienek bazituzten ganbarak, "trasteak gordetzeko erabiltzen ziren. Traba egin eta gutxi erabiltzen ziren trasteak, ganbarara! Toki askotan arropak lehertzeko ere ganbara erabiltzen zen, balkoia eduki arren".

BABARRUNA SEGURU, GARBANTZUA BATZUETAN

Esana dugu lehenago ere, "asteaz zehar babarrun gorria jaten genuen egunero eta asteburuetan, babarrun zuria edo garbantzu". Baserrietan, baratzaren eraginez, aukera zabalagoa zen, "baina orduan ez zen orain adina berdura egiten". Babarruna jateko ohitura oso zabaldua zegoen kalean eta baserrian. "Mahaietan berdura bakarrik jarri gero, hura jana ez zela esango zuten". Esaterako, azaren inguruan bazegoen aipamen bat, "aza hutsik jan edo besazpian eman, berdin-berdin. Alegia, alimenturik



Pepita Lasa

"Solomoak eta txorizoak oliotan edo txerri-gantzetan gordetzen ziren, ondo mantentzeko"

ez zuela". Ondorioz, eltzea jartzen zuten egunero. Potajea. Bestelako jakiak gero


etorri ziren. "Nik izango nituen hamabost/hamaseiren bat urte paella ezagutu nuenerako", esan du Encarnak. Arroza esnearekin bai, "hori betidanik ezagutu genuen. Jaietan eta festetan jaten genuen postre moduan" aipatu du Maritxuk.

Gaur egungo sukaldeetan, denetarik aurkituko dugu armairuetan. Baina zer aurkituko ote genukeen orduko armairuren bat zabalduz gero?, "Babarruna behintzat beti egongo zen. Gainerantzean, garbantzu eta babarrun txuria batzuetan. Pipermorro

poteren bat edo beste ere bai. Eta kristalezko botiletan etxean egindako tomatea. Orduan ez zen tomaterik entsaladan jaten. Igandeko haragi egosiari nahasten zitzaion tomatea. Saldarekin zopa egiten zen lehenengo”.

Baratza zeukatenek bertatik jasoko zuten babarrun uzta, baina gainerakoak, nola moldatzen ote ziren? “Lakaria erosten genuen”. Ba al dakizue zer den lakaria? “Neurri bat zen, hiru kiloko neurria. Gaitzerua hamabi kilok osatzen zuten eta anea, berrogeita bi kilok”. Berrogeita bi kilo! Inork erosiko ote zuen babarrun anea? “Azoketan babarruna saldu behar zuenak, anea bat edo bi anea erosten zituen. Kaleko jendeak ez, guk hiru bat kilo erosten genuen normalean. Merkatura lakarika neurtuta ekartzen zuten babarruna eta guk, etxean egindako telazko zakuk eramatzen genituen”. Lakarika, gaitzeruka edo aneak ez zen babarruna bakarrik neurtzen; baita, besteak beste, artoa edo intxaurrea ere.

Horrenbeste indar ematen zuten babarrun haiek nola prestatzen zituzten jakin nahiko duzue, ezta? “Ni ez naiz akordatu



Lakarian hiru kilo babarrun.

SUKALDEKO TRASTEAK

Etxe nahiz baserrietan baziren platerak, baina normalean, denek ontzi edo azpil beretik jaten zuten, baserrietan behintzat bai. Denborarekin ohitura hura galtzen joan zen, “etxe bat, bakoitza bere plateratik hasitakoan, aldaketa horrek pena eman ziola esaten aditu nuen oraindik denbora asko ez dela” aipatu du Pepitak. Eta Pakitik, “baserrik kalera ezkondu eta ‘zertarako lana?’ galdetzen zuenik bazen eta, ontzi beretik jaten jarraitzea erabaki zuenik ere bai” gaineratu du. “Mamia edo arroz con leche-a ere fuente beretik jaten ziren. Batez ere mamia jartzen zenean, festa ederra izaten zen. Azukrea botatzen zitzaion gainean eta azukre horren bila ibiltzen ginen denak. Azken ttontorra geratzen zenean, hura zeinek harrapatuko!”.

Zein traste gehiago izaten zuten sukal-

bezperatik beratzen jartzen zirenik” esan du Encarnak. “Ez, ez” erantzun dute besteek. “Goizean ur hotzarekin jartzen ziren; tipula, baratxuria eta olio gordinarekin batera. Gatz geroxeago botatzen zitzaion. Horixe, ez zen besterik egin behar. Egosi eta gero, baratxuriarekin frijituta olio ematen zitzaion garai hartan: olio erre”.

Eguerdian sobratutako babarrunari ogia botatzen zioten gauean gozatzeko, “eltze-kondoa edo sobran geratutako babarruna ur pixka batekin berotzen jarri eta, ogi zopak eta olio erre botatzen zitzaizkion berriro, gauean afaritarako. Oso ona geratzen zen”. Beste toki batzuetan hura izaten omen zuten jakia, “babarrunetako ogi xerrak ebaki eta babarruna atera baino lehen, beste platera batera ogi hura ateratzen zuten. Babarrunak fonte beretik jaten ziren eta ogi hura erdian jartzen zen jakitarako. Txerria hil eta hirugihar puskararen bat baldin bazen, babarrunetako egosita jartzen zen. Hura bai goxo!”.

“Kalean lanean hasi nintzenean, lantokian kaletar batek ‘esos comen muy bien’ esan zuen kaleko jendeari buruz ari zela, ‘comen macarrones’. Nik ez nekien zer ziren makarroak”, azaldu du Maritxuk. “Ez zen makarroiak” erantzun diote gainerakoek. “Makarroiak ez baino fideo zopa bai ederra! Ez dakit orduko salda ere ez ote zen hobe”.

Pelloc amaiera eman dio gaiari, “gauza gutxi den garaian, beti goxoago izaten da”. Barre egin dute eta Encarnak txerria hiltzen zuten garaiko pasarte gogoratu du, “eskolatik etxera joandakoan, amak



Sagardoa nahiz pattarra edo koñakarentzako edalontziak.

ogi tartean solomo txikiaren puska bat jartzen zuen baratxuriarekin. Nik halako gauzarik ez dut gehiago jan”. Pepitak, “bai, bai, txerriak duen puskarik goxoena da azpizuna”, “orain ere ez da txarra egongo hura, ez?” itaundu du Pelloc. “Ez dakit ba halako gusturik baduen” bukatu Encarnak. Solomoa bezalaxe gibela ere goxoagoa omen zen orduan.

Baserrian txerria hildakoan, gazituta mantentzen ziren zatiak. “Solomoak gazitu egiten ziren tamaina batean, eta besteak, zintzilika uzten ziren, lehortu arte. Orain izozkailuan sartzen diren bezala, lehen solomoak eta txerriak oliotan edo txerri-gantzetan gordetzen ziren, ondo mantentzeko. Kanpoan denbora gehiegi edukiz gero, gehiegi lehortzen baitziren”. Arrautzak, berriz, kareetan gordetzen ziren, “apirilean egiten zuten oiloek arrautzarik gehien, baina arrautzarik jartzen ez zuten bolada ere izaten zuten, ez zenerako gorde egin behar. Zenean, beraz, karetan jartzen ziren lurrezko ontzi handi batzuetan. Mehea zen aurrena botatzen zitzaion karea, gero gogortzen zen. Kare hila izena zuen. Kutxara batekin kontuz-kontuz ateratzen genuen arrautza eta garbitu egiten genuen jan aurretik”. Baserri gehienetan egiten zuten orduan karea, gehienek karobiak baitzituzten. “Gau eta egun egurra eman behar zitzaionez, hiru bat egunez zaintzen genuen. Kare bizia ateratzen zen, harria bezalaxe. Gero ura botatzen zitzaionean, prassst, haustu egiten zen. Horri kare itoa edo hila deitzen zitzaion”.



Pello Iribar

“Mutil koxkorra nintzela, juxtu-juxtu eramatzen nuen seiko ogia. Karga zuen”

gerra ondorenean etxean egiten zuten ogia, “gerra eta gero, dendan ez zen ogirik. Etxe askotan garia izaten zenez, ahal zen moduan gari hura ehoz, nolabait moldatzen ginen. Garirik ez zen kasuetan, irina erosi egiten zen”. Ez zuten labe berezirik, “ekonomikako labean egiten genuen ogia. Ederki egiten ziren” gogoratu du Ixabelek. “Egunero egiten genituen ogiak. Ogi luzeak, borbilik ez. Mamitsuak, goxo-goxoak” jarraitu du. Miseri garaia iritsi aurretik, dendan erosten zuten, “seikoak edo hirukoak, handiak edo txikiagoak. Seiko ogia handia

zen, sei koxkorrekoa. Pisu jartzen zuten eta, plast!, opil bat botatzen zioten gainera, behar adina karga ez bazeukan opilarekin osatzeko”. Pelloc seikoak pisu handia zuela aipatu du, “mutil koxkorra nintzela, juxtu-juxtu eramatzen nuen seiko ogia. Karga zuen”. Famili batzuetan egunean jaten zen seiko ogia, beste batzuetan ordea, aste guztirako gorde behar. 1940 urtean errazionamendua iritsi zen 1947 urtera arte, “komeriak izan ziren. Urte horietan zeinek ikusi ote zuen ogia? Artoa eta garia etxean eduki arren, errotak itxi egin zituzten. Gero estraperloa! Gaur angulak baino estimatuagoa zen orduan ogia”.

“Platerak zuriak ziren eta erraz hausten ez zirenak; txapazkoak baitziren. Margo zuria zuten eta jiran marra urdina edo gorria. Horiek erabiltzen ziren hasieran. Portzelanazkoak geroago etorri ziren eta jaietan erabiltzen ziren”. Txapazko platerak bezala, halakoxeak azpilak ere, “gogorrak ziren, baina kaskatu egiten ziren golpeekin”. Izen berezia zuten eltzeek orduan, “lurrezko eltzei ijito-atsoak esaten zitzaien”. Zergatik baina?, “Ijito-andreak

ARROPA GARBIKETA, LIXIBAREN ERRITOA



Encarna Jarza

“Asteko arropak pixka bat garbituko ziren, baino lixiba, hilean behin-edo egiten zen”

Egun baino arropa aukera gutxiago izanagatik, orduan ere, pilatzen zen arropa erabilia. Arropa garbitzea erriro modukoa zen. Kale etxeetakoek garbilekuetara jotzen zuten. “Etxean beratzen jartzen genuen arropa eta jabatu egiten genuen. Gero garbilekura joaten ginen uretan pasatzera. Emakume gehienak baldea buruan hartuta joaten ziren”. Mugimendu handia sortzen zen garbilekuetan, “orain jubilatu batzuk ibiltzen dira, ba, denbora pasa? Modu hartan joaten ziren batzuk garbilekura, kontuak esanez tertulia egitera. I-ji-ji eta a-ja-ja, algara ederrak entzuten ziren”. Villabonan bi garbileku zeuden, Berdura Plazan nagusia eta Subijana baino aurreraxeago txikia. “Berdura Plazakoak burnizko ate handia zuen eta giltzarrapoarekin ixten zen. Goiz eta arratsalde irekitzen zuen arduradunak”. Baserrietan lixiba egiten zen,



Arropa zuria zintzilik.

© Lopez de Gereñu

“asteko arropak pixka bat garbituko ziren, baino lixiba, hilean behin-edo egiten zen. Kuelan egiten zen garbiketara nagusia, baina aurretik, xaboiarekin beratzen uzten zen arropa lehenengo, zikinik handiena kentzeko. Egurrezko barrika handi bat zen kuela, behean, ura ateratzeko bi zulo zituen. Azpi-azpian, zumitzezko zotzak izaten zituen eta haren gainean, prendarik txikiak, ilunenak jartzen ziren aurrena. Pixkanaka-pixkanaka, zikinetik garbienera betetzen zen ontzia. Kuela arropaz betetzen zenean, asto-ontzia deitzen zitzaion zaku garbi-garbia jartzen zitzaion gainean. Zakuari sutako hautsa gehitzen zitzaion,


hark gustu berezia zuen, bai goxoa!”. Basoak baino antxunak erabiltzen zituzten esnea edo ura edateko, “poto zuriak ziren, marra urdina zuten eta alde batean, kirtentxo bat”. Baserrietan, bertan eginiko sagardoa daten zuten otorduetan, “etxe ko aitak sagardoz betetako txarroa edukitzen zuten. Eta txandan-txandan, baso berean banatzen zuten. Handik pixka batera, berriz ere, nahi zuenari ematen zion. Txarroa bukatzen zenean izaten ziren komeriak, inork ez baitzuen sagardoaren bila kupe-lera joan nahi izaten. Mutil-kozkorrak txandaka jaisten ziren ukuilura generalean. Baina, sukalde goran zegoen kasuetan behinik behin, eskandalua seguru izaten zen. ‘Horri tokatzen zai’ eta ‘hari tokatzen zai’...” Zahatoa ere izaten zen etxe gehienetan, “ardoa pitxarrako botilatan gordeta edukitzen zen egun berezietarako. Botila handietan gorde ere, hiru bat litro eta erdiokotan”. Baserrietan ez zuten sekula urarekin bazkaltzen, “sagardo barrika behera bazihoan, gazitu egiten zen eta hari ura botatzen zitzaion”. Kale etxeetan, otordu batzuetan, ura daten zuten.

hautsak arropa garbituko zuenik? "Dudarik gabe, ederki garbitzen zuen arropa. Irina bezala, hauts fina eta leun-leuna erabiltzen zen lixiba egiteko, su baxutik hartutakoa". Baserri atari denetan zeuden garbilekuak eta bertan arropak uretan pasatzeaz gain, garbitu ere egiten zituzten lixibarik egiten ez zutenean. "Askotan pertsona putzuan sartuta garbitzen zen arropa. Uretan sartuta aritzen ginen garbiketean, alajaina! Eskuarekin xaboia eman eta, jo eta jo. Bai, bai; jo egiten zen arropa". Eguzkiaren argia ere baliatzen zuten aurrerago, "arropa jabatu eta zelaian ere jartzen zen zabalduta. Ederra zen hura ere. Eguzkiaren berotasunarekin zuri-zuria geratzen zen arropa. Hura kolorea! Ez zegoen lejiaren beharrik". Arropa

garbiak zintzilikatzeko, alanbrea jartzen zuten batetik bestera, "herdoilarekin izaten ziren festak gero. Alanbre galbanizatua aurkitzea ez baitzen hain erraza". Horrenbeste lan arropa garbitzen eta herdoilarekin zikintzeko arriskua, gainera!

Lisatu, arropa lisatu ere egiten zen. Beste era bateko lisaburdinak edo plantxak zituzten, noski; elektrizitaterik gabekoak. "Aurrena brasa pixka bat barnera sartu eta egur ikatzarekin berotzen zen hainbat lisaburdin. Pisu handia zuten" ederki gogoratzen du urte askoan pantalonera izan zen Pakitak. "Harekin norbait plantxan ari zen garaian, berriket gutxi aldamenan" esan dio Pellok. "Bai horixe! Ondo erre gabeko egur ikatzaren eraginez, a ze buruko minak! Zorabiatu

ere bai, gasa sortzen baitzuen. Behin baino gehiagotan ateratzen zituen txinpartak". Beste lisaburdin batzuk, ordea, kanpoalderetik berotzen ziren, ekonomikaren beroa erabilita.



Egur ikatzarekin edo ekonomikako berotasunarekin berotzen ziren lisaburdinak.

ETXEAREN GARBIKETA, MENDA USAIN FRESKOA

Etxea garbitzeko ere zenbat peripezi, "eskoba edo eskoboa pasatzen genuen lehenengo, gero alanbrearekin igurzten genuen lurra eta atzetik, argizaria ematen genien eskula batekin. Distira, berriz, trapuarekin ateratzen genuen". Sukaldea fregatu egiten zen, baina gainerako gela guztietan, bata bestearen atzetik jarraitzen zituzten pausoak. "Eskoberoak egiten zituen eskobak palmitoa erabiliz, eta guk, erosi egiten genituen. Eskoba deitzen zitzaion horri eta ez erratza. Erratza ukuilurako edo kaleak garbitzeko erabiltzen zen, txilarrarekin edo mando belarra deitzen zitzaion belar luzekin egiten zuten. Eskoba baino sendoagoa zen. Baserratza, gorostiaren antzeko zuhaixkaren adarrekin egiten zen, armiarma-sareak kentzeko edo tolarean sagardoa ateratzeko erabiltzen zen, zuloan jartzen zitzaion; sagardoa garbiago ateratzeko, filtro moduan" bukatu du azalpena Pellok, "bai jauna, ondo ari gara" esan du Encarnak. Gainerakoan etxea garbitu eta usain ona emateko, menda belarra erabiltzen zuten. "Garbitasun guztia egiten zenean, gerok jasotako menda belar sorta pasatzen genuen; eskobari edo makila luze bati lotuta jarrita. Oso ona zen arkakusoak akabatze eta, oso usain ona eta freskoa uzten zuen etxean. Usaina eta freskura denbora luzeagoz mantentzeko, leiho guztiak ixten genituen hura pasatakoan".

Argizariaz gain, etxea garbitzeko ez zuten bestelako produkturik erabiltzen, "janari dendetan erosten genuen argizaria. Baita kandelak egiten zituzten lekuetan ere". Sukaldeko ontziak garbitzeko ez zuten produktu berezirik hasieran, "geroago bai".



Pakita Lasa

"Menda belarra oso ona zen arkakusoak akabatze eta, oso usain ona eta freskoa uzten zuen etxean"

Pellok azaldu duenez, "ni mutil kozkorra nintzela, gure amak sutako hautsarekin garbitzen zituen ontziak. *Artillera* deitzen zitzaion zaku batean sartzen zen hautsa eta garbitu ere, ondo garbitzen zuen". Beste batzuetan, sutako hautsa egosi ere egiten zuten eltze handietan, gero, ur harekin, ontziak garbitzeko. "Ur hura txerrientzat gordetzen zen erabilitakoan, koipea zuela esaten baitzen". Dena aprobeztatzen zen, ez dago zalantzarik. "Zaborrik apenas sortzen zen etxeetan. Barazki eta fruta azalak ekonomikan erretzen ziren, plastikorik ez zen batere, latak ere gutxi... Olioaren bila-edo joanez gero, botilarekin joan behar genuen. Berdin pattarraren, koinakaren edo beste zerbaiten bila bagindoazen ere. Ogi-irina edo azukrea biltzeko paper-estraz izaten zen. Estrazarekin egindako zorroak ere baziren. Etxe guztietan sua zegoenez, erre egiten ziren gero. Han ez zen ezer ere botatzen". Hura bai birziklatzea eta ez gaur egiten dena... "Alde batetik garbitasun gehiago egongo da egun, baino bestetik, ezta hurrik eman ere!".

Lagarto eta Chimbo, bi xaboi horiekin garbitzen zuten arropa. Arropa oso zikinak

garbitzeko, berriz, Sosa erabiltzen zen, "grasa kentzeko oso ona zen, lantokiko arropi batez ere. Oso fuertea zen, erre egiten zituen eskuak". Kolorezko arroparentzat 'leji en polvo, El Oso' izaten zen, baina erosi baino gehiago, etxean egiten zen xaboia. Nola? "Seboa ekartzen genuen batetik eta ezkataren antza zuen sosakaustika bestetik. Orain kloroa esaten zaiona izango da seguru asko. Erre egiten zuen. Drogeritik usain fuerteko hauts bat ere erosten genuen, xaboiari usaina eman edo aparra eragiteko. Hiru osagai horiekin nahikoa zen. Ur irakinetara seboa bota eta sosakaustikak desegin egiten zuen den-den-dena. Seboaren giharrak eta denak jaten zituen. Gogor-gogor egin baino lehenago, molde batean jartzen zen eta zatika mozten zen gero. Etxeko xaboiarekin, Lagarto edo Chimbo erosi gabe garbi genezakeen arropa". Hara hor xaboiaren nondik norakoen berri eta "bizimodua atera daiteke, horrela saiatur gero", Pelloren adierazpen adierazkorra. Xaboia edozein zauri sendatzeko oso ona dela aipatu dute hizlariak, "medikuek asko erabiltzen zuten zauriak garbitzeko eta oraindik ere, mediku batek baino gehiagok erabiltzen du. Egin kontu, edozein zauri baduzu eskuan eta arropa eskuz garbitzen ari bazara, zauria ez da gaiztotzen. Sendatu bai, azkar".

Ezkaratza lejiarekin, balde batean xaboi-urajarrita, espartzuarekin garbitzen zuten. "Lejiak egurra jan egiten du. Egurraren betak edo nerbioak agerian utzi arte garbitzen genuen. Eskailerak zuri-zuri geratzen ziren, oso politak. Eguraldi onarekin hainbestean, baino txartzen zuenean...".



BASERRIKO FAMILIA:

Mikel Yarza baserriaren kanpoan ezkerretik eskubira; Migel Jose, Encarna, Juanita Zendoia (ama), Bittorio (magalean), Maria, Jose Manuel Yarza (aita), Manuel (magalean) eta Valeriano, 1922 urtean.



KALEKO FAMILIA:

Luis Zalakain eta Antonia Odriozola senar-emaztea bilobekin, Etxauntxiki baserriaren aurrean 1964 urtean.

ETXEKO LANAK, EMAKUMEAREN ARDURA

Hizlariak, emakume nahiz gizon, ez dute zalantzarik egin, "dudarik gabe, emakumeak arduratzen ziren etxeko lan guztiez". "Kantari aritzen ziren gainera" zehaztu du Pellok. "Egia!" erantzun diote, "kanpoan lan egiten zutenen etxeetan aritzen ziren neskameek ere, kantuan egiten zituzten lanak. Hura alaitasuna!". Alai eta arin ibiltzen omen ziren gainera, "etxetik kanpo lan egiten zutenak, senarra bazkaltzera etortzerako, korrika etxeratzen ziren. Ogia, ardoa eta platera mahai gainean prest eduki behar zirela esaten zen. Emakumeak bazkaldu aurretik, senarrari ematen zion bazkaria". Hainbat emakumek fabrikako lana utzi egiten zuen ezkondu eta gero, "beste batzuek kanpoko lanarekin eta etxekoarekin jarraitzen zuten, eta haurren ardura ere eurenaren zen. Emaku-

me askok, kanpoan nahiz etxean lan egin arren, bederatziko edo hamar seme-alaba hazten zituen; ondo gainera. Indartsuak ziren. Emakume batzuk, haurra izaten zuten egun berean ere lanean ikus zitezkeen". Etxean zeudela, ez zuten denbora liberrik ezagutzen, "beti bazegoen zeregina. Ez zegoen irratirik, telebistatik... Konponketa franko bai, arropi edo maingiderei puskak eransten". Ezeren truke, lan eta ardura handia emakumeek beren gain hartzen zutena eta dutena, "oso lan gogorra da; erretirorako behinik behin, laguntzaren bat eman beharko litzaieke etxeko andreei". Eta zein ote zen gizonzkoaren papera? "Gizonak, oro har, sagardotegira tertulia egitera. Sagardoa basoka saltzen zen eta batzuek, etxetik jaki-ontzia ere eramaten zuten,

mokaduren bat egiteko. Hainbat gizonak, hala ere, haurrak txikiak ziren bitartean jaten ematen laguntzen zuten. Besteak beste, aroztegiako lanak, saski-ipurdiak, behien burko sokak edo abarkak egitea gizonen lana zen. Neguan zerbait egin behar eta...".

Ezgarbigailu, ez hozkailu, ez berogailu... baina ahal zuten modura, familia handiak ateratzen zituzten aurrera. Noski, trukuak ere bazituzten, "ohea berotzeko ur berotzetako botila edo adreilua erabiltzen zen. Beroarekin botila ez lehertzeko, iltze bat sartzen zen barrura. Adreilua, berriz, ekonomikako labean berotu eta trapu batean bilduta sartzen zen ohera. Eztarriko mina zenean, gariaren zahia berotu eta galtzertarian sartzen zen. Beroa denbora luzez mantentzen zenez, eztarria gozatzen zuen". Hozkailuen

aldean freskerak erabiltzen zituzten, "leihotik kanpoaldera jartzen ziren, sare batekin itxita. Bertan gordetzen zen esnea edo egunean sobratutako janaria. Neguan ondo moldatzen ginen. Udan..., tira!". Oraingo berrikuntzek alde onak badituztela eta bizimodua errazten dutela diote hizlariak, "baina, garai hartako emakumeak etorri eta

berrikuntza horiek guztiak ikusiko balituzte, 'ze sorginkeria da hau?' esango lukete. Seguru!". Pepitak baserriaren inguruko uste okerra argitu du, "baserrian ez zela goserik izaten esaten zuen batek baino gehiagok. Hori ez da egia. Baserrian bizitze hutsagatik ez zen jatekorik sortzen; zerbait izatekotan, gogotik egin behar zen lana".

Garai gordin bezain gogorrak izan arren, laguntasuna nabarmentzen dute, "orain adina hilketa, tratu txar eta separaziorik ez zen. Denak lagunak ginen". Pelloren adierazpen esanguratsuekin amaituko dugu gaurkoa; "laurogei urteko pertsonaren esperientziarekin eta hogeita hamarrekoaren abilitatearekin, gauza asko egin daiteke". Zer diozu?

Etxearen antolaketa, jateko ohiturak, prestaketa, txukunketa nahiz garbiketa lanak, erabiltzen zituzten bitartekoak eta trasteak... Etxeko lanak hizpide, iraganean galdutako ohiturak oinarrian hartuta, a ze nolako errepasoa egin duen seikoteak!



Isabel Beraza



Martitxu Mendizabal



Pepita Lasa



Pello Iribar



Encarna Yarza



Pakita Lasa

...ETA HURRENGOAN ZER:

16. zenbakian garai bateko dendak, tabernak eta sagardotegiak izango ditugu mintzagai. Kokapenez gain, dendarien edo tabernarien izenak zehazten ere saiatuko gara eta noski, zer saltzen zuten, ze giro sortzen zen, nolako saltokiak ziren... Tratua zuzeneko zen, saltzailearengandik bezeroarengana eta alderantziz. Gai polita, ezta? Gu bezainbeste erakartzen bazaituzte, itxaron pixka batean; hurrengo hilean izango duzue giro haren berri.



Kale Nagusiko Turko tabernan, tabernariak eta hainbat bezero.

ARGITARATZAILEAK



Amasa-Villabonako Udala



Manuel Larramendi Kultur B. azkuna

Argitaratzaileak: Manuel Larramendi Kultur Bazkuna, Amasa-Villabonako Udalaren dirulaguntzaz. Ekoizlea: Erroitz B.M. Zuzendaritza eta erredakzioa: Ainhoa Arozena. Maketazioa: Maddi Trutxuelo. Argazkiak: Xabi Ubeda, Erretratu zaharren liburua (Larramendi Bazkuna) eta artxibo ezberdinak. Inprimaketa: Sortu grafikak (Zizurkil). ISSN: 1698-7330. Lege gordailua: SS-1289/04. Tirada: 1.400 ale.

EKOIZLEA

BABESLEA



Eusko Jauriaritza KULTURA SAILA